

名

山

藏

名山藏卷之

晉江何喬遠 撰

王享記二

琉球

安南

真臘

暹邏

琉球國居東海唐宋皆不賓貢高皇帝使行人楊載持詔其國國凡三曰中山曰山南曰山北中山王名察度山南王名承察度山北王名怕充芝皆以尚爲姓皆遣使入貢貢上嘉之使使賜三王印與皮弁冠服至則三王治兵相攻上復使諭之使其息兵養民於是中山王遣世子及國相子來學又有女師生姑

魯妹二人者亦來上賜之裘葛甕餼視中國儒生加
一等居頃之世子國相子與雲南生非議詔書上怒
皆治罪死久之中山王復遣使貢上賜之閩中舟工
三十六戶察度卒子武寧嗣武寧卒子思紹嗣思紹
卒子巴志嗣而承察度卒無子其從弟能撫其國人
承察度意屬之未樂中封爲山南王其後山北山南
皆爲中山所兼自巴志以後爲尚巴爲尚忠爲思達
爲金福爲泰久爲德爲圓爲眞爲清爲元爲未莫不
內奉唯謹薨必計封必請其國故磽瘠民儉僮少勤
不知禮節文字入明以來乃慕尚華風革其舊俗從

我聲教其國立法司官察度官司刑者也過闔官那
潮港官司儲者也耳目官司訪者也三官者武臣也
以上世及所豁地爲姓名大夫官長史官通事官司
貢者也文臣也以通中國書及閩三十六姓之後人
爲之王并日視朝日三朝群臣搓手膜拜有慶則觴
王王與之坐歡卑者跪俟檻陛外移時王所居甚高
貫陶珠五色爲簾出乘肩輿人二八前後人百數左
右擁武士蒙首如蒙俱以五色陶珠爲蓋又珠爲小
團扇集大鳥羽爲大團扇其賦斂稍合中國古井田
制上下有分土國有大事暫鳩而加征焉其法令簡

嚴不責少文其文章亦能明佛而通經其武事刀劍
弓矢皆嚴利削直射可至二百步禮尚跣敬則跣樂
用絃歌童子擊柝舞親喪數月不肉食無釜爨用螺
殼無絮織麻有布釜與絮者必白王不則罪用日本
錢如宋季鴟眼錢也

自廣西憑祥南行四百里安南國也東抵海西界老
撾南入占城於唐虞爲南交秦屬象郡漢平南越置
交趾刺史馬援立銅柱焉其名安南自唐始也皆置
州縣長吏唐亡交人曲承美據其地其後篡奪不常
而安南爲夷國然皆內稱臣中國亦用爵號羈縻之

宋時丁部領者爲交趾郡王部領死子璿幼相黎桓
篡之凡傳三世二十年而安南有黎氏其後黎氏相
李公蘊亦篡其位七傳而爲昊昂老亡子有一女謝
升卿者閩人博徒也美少年亡命邕州交趾相率國
人貿易邕界上見升卿異之與偕歸納爲王女壻王
死女主國事因以與其夫而升卿變姓名爲陳日煚
再傳爲日烜元時僭稱爲越皇帝三世而爲安南國
王陳日煇安南累世皆名日旁從火上陽之義也其
稱臣中國者一名自稱國中者又一名高帝旣定天
下詔告諸夷日煇人貢求封爲諸夷先高帝嘉之使

學士張以寧持詔封爲安南王賜駝紐銀印黃金塗
雜繪四十疋頒正朔令世世毋伐其國以寧行至境
上日燿已卒其兄子日燿嗣欲卽求王印以寧抱璽
書不字使請於朝而待之境上旣奏上命以寧字日
燿印別使使弔祭日燿以寧乃入日燿郊迎爲日燿
位北嚮使者南嚮授詔日燿俯伏謝其明日長跪稽
首受印交人故以揖爲禮至是長跪稽首以寧還報
命上悅其詳曰是吾使者日燿居國色荒嘗以兩女
進其婉婉艷麗縫工巧六宮無與比高帝受之旣
數年復以兩女進高祖不悅曰彼謂朕漁色耶并出

前一女返之命使者曰歸語王嫁之猶女體也日燧竟以荒昏不治爲其叔父叔明所逼死而叔明自立爲王懼明問其罪以高帝五年遣使貢馴象覘上意表上禮部尚書有副主事曾魯恥視之怪其非故王名卽易世胡不以世告責狀得其情上曰叔明王法所必誅宜正名致討其速擇日燧親賢立之叔明懼上表謝罪上令且以前王印視事若能保安疆境後乃定之旣自請老代以其弟日燾許之日燾與占城構兵相攻戰死弟日燿立與占城相攻如故上勅諭之日燿貢四象三奴人入謝上口安南國令其三歲

貢以土所宜久命之矣胡數數也小之事大未堅其
心豈在物耶王之封疆密邇邊陲若互生情愛亦可
福我黎民其令象犀之屬毋或再進使送一人效誠
而已叔明雖已謝事實專持其國亡何與其國相黎
季犛通弑日煒自立其子曰焜爲王久之叔明死告
哀求吊上曰叔明弑臣也不誅幸矣何吊之爲因絕
其貢使日焜惡其相季犛稍裁抑之季犛不能堪以
建文元年弑日焜立其子頤益與子黎蒼顓政亡何
弑頤立顓子炎襁褓中又亡何亦弑之大誅陳氏宗
族臣僚獨日燧弟天平者久被斥在外節武侯裴絳

耆代其故侯渴真禦寇東海上得免季聲調陳裔胡
舜之後更姓名曰胡一元子蒼曰夸稱大虞皇帝自
稱太上皇改元國中而陳氏絕矣成祖卽位胡夸遣
使入賀且言陳氏諸嗣王短命支庶皆盡已其外孫
被衆推擇求封爵填之上使行人楊渤往視其信否
陪臣耆老具如夸言許之而陳氏故臣且推天平爲
主以復季聲之讐季聲因遂捕天平甚急亦收戮伯
耆之孥以求伯耆二人亡匿久之伯耆因爲商人負
任出關天平亦從間道入老嫗皆得詣闕見上具言
季聲篡弒狀因叩頭流涕上憐之賜天平居第米廩

給伯耆鮮衣饗飧永樂二年也其冬安南使來賀年
上召天平示之使者識其故王孫皆錯愕下拜有感
泣者伯耆廷責以大義皆惶恐不能對上曰有是哉
其明年使監察御史李琦行人王樞持詔切責夸夸
上表謝罪請迎歸天平以君事之上使行人聶聰報
曰朕君臨萬邦推心無間尚慮爾詐爾誠應朕迎君
天平當建爾上公封以大郡傳世亡窮朕之斯言上
通於天佇俟來章以頒顯命夸復使使從聰入奏曰
謹遣陪臣景真迎天平還敢有二心明神殛之臣亦
當率國人逆境上上曰信矣乃使天平治任以行封

胡奎煩化郡公盡食所屬州縣天平行陛辭上曰齊桓晉文之事勉矣勅廣西征南左副將軍黃中右副將軍呂毅以兵五千待天平至護之還國天平至中毅率兵送之大理卿薛嵒者辯有口坐事謫廣西中請與偕至丘溫奎遣陪臣晦卿犒師候餼安南人見天平皆拜舞蹈躍黃中問晦卿奎何不至也曰安敢待於嘉林矣橋有微疾不能遠耳中使晦卿還促奎且遣騎覘之皆無所見而迎者相隨續遂度隘留雞陵將至芹站山陘峻不得列騎忽伏發大呼劫殺天平中倉卒整兵前賊帥已斬絕其橋道遙拜曰遠夷

非敢抗大國犯王師天平小人也非陳親屬敢肆巧
僞上惑天聰今幸得殺之以謝天子吾王卽當上表
待罪天師遠臨小國貧乏不足久淹中不得進引兵
還而薛崑在賊中自經死永樂四年也上聞大怒會
占城亦訴奎屢侵其國王爲塗金銀印九章冕服王
帶逼賜之責之朝貢曰胡但尊明七月辛卯上命成
國公能佩征夷將軍印充總兵官西平侯晟佩征夷
副將軍印爲左副將軍新城侯輔爲右副將軍豐城
侯彬爲左參將雲陽伯旭爲右參將率二十五將軍
領兵十萬討之兵部尚書劉儁贊其軍赦黃中呂毅

使立功自贖令大將軍成國公出廣西左副將軍西平侯出雲南成國公行車駕臨送之而勅西平侯曰古人有言師克在和故軍門謂之和門其與大將軍參心成事毋違以敗師成國公至龍州卒新城侯輔總其軍至坡壘關輔遣都督同知韓觀斬除箐翳繕治道路而呂毅先偵賊斬賊首四十級隘留關下遂度至雞翎關驃騎將軍榮斬賊首六十餘大軍從雞翎自芹站以西至北江之新福黎氏三帶州僉判鄧原南策州人莫邃來見具言賊衆水陸號七百萬守宣洮施富良四江以保其東西都大軍遂自新福移

營三帶箇招市江口其冬西平侯亦自白鶴奪宣江
江面軍次洮江北岸對壘多邦城賊地峻逼獨多邦
稍衍賊樹柵立城連橋接艦七百餘里兩軍相合新
城侯攻西南西平侯攻東南四鼓黃中令士銜枚以
雲梯傅城西南下都督蔡福先登恣刀砍賊賊亂遂

燃夜明光

夜明光火藥
內府所製

鳴銅角登之賊皆躍下城走

驅象以戰遊擊將軍朱廣晝後貌蒙馬殺其帥二人
追至傘圓山大軍循富良江南下擣其東都豐城侯
彬雲陽伯旭擊其西都宣洮諸州縣皆次第降五年
新城侯輔與清遠伯王友西平侯晟與都指揮柳琮

合兵濟江襲破之於壽江柵又破之困枚山萬劫山
普賴山斬首三萬七千三百九十級進破之木丸江
奪其艘百餘斬首萬級莫邃與耆老沛等千百二十
人詣軍門言伏見黎賊不臣天朝興吊伐之師詔書
必獲惟其父子及所同惡脅從無辜具釋不治訪求
陳後立之甚大惠也安南本古中華地久淪夷俗不
聞聲教幸遇聖明掃孽除兇惟陳氏子孫爲黎季犛
殲夷已盡無有孑遺臣等咸願復古郡縣永爲編戶
輔等納而代奏之季犛復自悶海口入富良江以水
陸數萬合戰新城侯與西平侯以舟師橫擊之會都

督柳升兵亦至斬殺無算江水爲殷季犛父子僅乘舳遁新城侯輔復追之興臾海門涇鵲淺涸不可舟雨遂乘漲循舉厥江追之奇羅海口卒王柴胡等七人生擒季犛及其子偽推誠守正翊贊弘化功臣雲屯鎮兼歸化鎮嘉興等鎮諸軍事節度大使洮江管内觀察處置使等使持節雲屯歸化嘉興等鎮諸軍事領東路天長府路大都督府特進開府儀同三司入內簡較左相國平章軍國事賜金魚袋上柱國衛國大王黎澄而土人武如卿等亦擒獲黎蒼及其弟偽大原鎮兼天開鎮驃騎上將梁國王黎澈偽新安

鎮驃騎大將軍新興郡王黎汪其子僞太子黎芮僞
郡嗣王黎滷僞郡亞王黎范其叔父僞臨安鎮兼大
海鎮驃騎大將軍特進開府儀同三司入內相國平
章事賜金魚袋上柱國唐林郡王黎季胤其諸弟姪
僞郡亞公黎原咎僞平陸縣上侯黎子驛僞御輦署
一旬正掌卿侯黎叔華僞清亭侯黎駿石塘鄉侯黎
廷燁僞永祿亭侯黎廷熿與其僞將相胡杜黎景琦
等安南悉平詔曰惟皇考太祖高皇帝混一天下懷
柔遠人安南陳日燿慕義嚮風率先職貢遂封爲王
世有其土比者賊臣黎季犛及子蒼殺其國主戕及

闔家詭易姓名自謂陳甥誑言陳絕請求襲爵幸遂
奸謀肆無忌憚僭國大虞紀年元聖自稱兩宮皇帝
陽奉正朔陰冒朝儀覬覦南詔窺伺廣西據思明之
數州侵寧遠之七寨欺弱占城奪之上疆逼與章服
要其貢賦安南王孫奔竄來訴黎賊謬陳誠款乃伏
兵要殺拒辱明使蠢茲兇豎敢橫大邦爰命總兵官
征夷將軍新城侯輔等率師討之生擒季犛及子蒼
澄與其家屬偽將相官僚季貔杜等遍求陳後立之
其國吏民咸稱陳氏子孫被害已盡無可嗣繼安南
本古中國郡縣願復內嚮朕俯徇輿情從其所請置

交趾都指揮使司承宣布政使司提刑按察使司及
軍民衙門設官分理故安南國王爲黎賊所弑宜與
贈諡愍厥幽冥仍爲立祠治塚墓給祭掃三千戶子
孫宗族爲所害者各贈以官其郡縣官吏皆陳舊人
脅於黎賊良非得已詔到悉仍其故有司敦禮者碩
養濟鰥寡孤獨放弛鉗徒囚繫者有懷才抱德之士
敦遣至京朕將量才用焉遂開設交州北江諒江三
江太原宣化建平新安建昌奉化清化鎮蠻諒山新
平又安順化升華十七府威蠻等州四十七州各領
縣有差以都督僉事呂毅掌都指揮使司事以黃中

爲副以尚書黃福兼掌布政按察二司事置參政參
議副使僉事等官而以裴伯耆爲右參議莫邃爲諒
江知府其他府州縣吏以下使新城侯自置改雞陵
關爲鎮夷關莫邃者陳氏之臣也以其祖父世事陳
故不從季犛其後累遷交阯布政使卒與其子嵩皆
死季犛難安南人謂莫氏世忠義之家云是爲永樂
五年其年九月乙卯上御奉天門受露布獻俘下季
犛及子蒼僞將相胡杜等獄釋澄芮械繫赦之澄故
善槍至是獻神槍法上使諸將受其術官焉

澄後任至工部

侍郎至今軍中祭兵器并祭澄也

六年新城侯輔西平侯晟等班師

上進封輔英國公晟黔國公其餘論功有差初輔之
受降也有陳氏故臣簡定者在籍中與其黨陳希葛
中道亡去大軍既還交人阮師鄧悉等復推簡定爲
主往來又安化州山中出攻盤灘鹹子關扼三江寇
近城諸州縣稍應之賊勢復盛上復以黔國公爲征
夷將軍討之使兵部尚書儁仍贊其軍黔國公至生
厥河戰敗儁與都督呂毅參政劉昱都指揮柳琮皆
沒而阮師等復推簡定爲僞上皇別立其從子季擴
詐其民以陳姓七年上復命英國公輔佩征虜副將
軍印充總兵官清遠侯友充副總兵益發師與晟會

其明年英國公進兵慈廉州攻喝門江枋社營柵皆破之以划船敗其黨阮世每於鹹子關又敗鄧景異於大平海口季擴懼使段自始致書曰故安南王孫也英國公曰陳無人矣奉命討賊不知其他殺之遂進擒簡定及希葛等械送京師伏誅是冬上征虜召英國公還勅黔國公晟與雲陽伯旭征餘黨晟追勦之虞江斬首三千餘級季擴遁其明年遣人上表降上救之以爲交阯布政使阮師鄧景異等皆授官有差季擴陽奉順實弄兵如故明年復命英國公率衆轉戰連年乃盡獲之交阯復平十三年英國公班師

還命鎮之置郡縣焉英國公之下交陞也凡三獲僞
王威震西南夷中而尚書黃福則數詔其郡邑吏新
造之邦新附之民毋輕虐也問疾周貧禮賢雪罪一
切政令並從寬簡交人悅之輔善用兵福善守民威
惠並流交相得也十五年復召輔還代以豐城侯彬
遣內官馬騏爲鎮守太監又安知府潘僚俄樂縣巡
簡黎利者皆故季擴之人有反側心馬騏贖貨煩苛
常折辱之僚利皆怨十六年春利僭稱平定大王攻
劫四出彬遣都督朱廣方政先後討之多失利交陞
布政使司左參政馮貴右參政侯保皆死之而潘僚

亦反於衙儀又安衛土指揮路文律從之妖僧范玉
自言天降劔印令爲安國主亦僭稱羅平王反塗山
其它盜賊四起豐城侯遣裨將誅討雖有斬獲竟不
得其首惡於是請屯田益兵守之利乃亡之老樞久
不出會是時豐城侯薨而上方北征虜車駕崩榆木
川朝廷無暇遣人將仁宗卽位乃使榮昌伯陳智領
其軍以黃福老臣久在外召之還代以兵部尚書陳
洽於是福撫交十九年矣交人扶攜攀號如失父母
也其時利久匿老樞已爲老樞人所逐出復還瑰止
俄樂官軍追之出其男女四百人降竟身不至麾下

都督方政指揮同知伍雲陳忠復與戰又安清化諸處皆敗沒雲忠並死之內官山壽曰臣於黎利有恩願往諭降之上曰可使代驛赦利罪與自新授清化知府會上崩宣宗卽位益命方政與陳智山壽持勅往諭利利益攻剽自如圍茶籠州凡七月智政進戰敗績交趾人琴彭者以土官知府爲假州亡其軍三之一固守不殆竟死焉而芙蓉縣賊潘可利者從利益劫略蓋太原宣化屬縣號紅衣賊勢益熾上乃命大發楚蜀二王護衛軍及便附諸省馬步軍六千人往討之選調便附諸府土兵三千餘人以爲嚮道使

太子太保成山侯王通佩征夷將軍印充總兵官都督馬瑛充參將尚書陳洽贊其軍削智政爵使立功自贖宣德元年也初智懦政勇素不相能內官壽一意招撫擁兵不掠故至於敗而中國之兵老交趾者至是十年再世而不能平天子亦厭之矣上謂蹇義夏原吉楊榮楊士奇曰昔我高皇帝混一天下平均四裔安南臣服最先其後黎氏篡陳奪之故太宗皇帝爲陳討賊求陳子孫使復土及其無後乃俯徇民心許爲郡縣豈有意勞師求之哉寇比蛇豕逐鹿於其黨中而交趾苦兵連歲一方生靈屠戮已盡中國

之人亦疲奔命先帝居守南京時惻然愍之嘗以謂朕高皇帝太宗皇帝之意朕心藏之及先帝卽位慈仁之言形於詔旨且高皇帝有訓四方諸夷及南蠻小國限山隔海其地不足供給其民不足使令若不自量來撓我邊彼惟不祥彼不爲中國患我伐之亦受其不祥昨者遣將出師通夕不寧茲博求支裔令爲藩臣卽欲如洪武永樂初故事使自爲國歲奉常貢以全一方民亦以休息我中夏卿謂何如義原吉對曰太宗皇帝平定茲方勞費鉅矣若以二十年勤力棄之一旦謂國威何榮士奇對曰交趾於唐虞三

代不屬皆置之荒服之外堯舜禹湯文武不以貶帝王漢唐之後雖爲內郡縣然喪師費財不可殫紀曾不得其一錢一兵之力昔者楚子從申叔時之諫而止縣陳漢元帝納買捐之之議而罷朱崖前史至今用爲稱說彼國君中主猶能服義包荒陛下偃兵息民哀念元元誠大惠也犬豕豺狼寧足治耶上曰朕心如此矣第觀之乃下詔大赦交阯罪罷交中採辦諸雜賦王通至與黎利戰勝負相當及寧橋陷淖敗績陳洽死焉賊遂圍東關先是通所遣人奏事皆爲賊所遮留至是謚與和使政平州知州何忠千戶杜

勝與其酋長入謝實欲請益兵至昌江其酋知之執忠勝酌忠酒說之降忠奪杯擊酋面遂與勝及其子皆死之黎利益率衆攻圍所向猖獗於是通無復固志棄清化以南屬利獨清化知州羅通與其指揮打忠方戰賊引去轉攻隘留百戶萬琮亦擊走之宣化土官同知陶季容等追之清波縣賊獲其丞使還招季容季容亦罵賊不爲動上復以賊勢猖獗命安遠侯升佩征虜將軍印充總兵官保定伯銘充副總兵都督聚充右參將出廣西黔國公晟佩征南將軍印充總兵官興安伯亨充左副總兵新寧伯忠充右副

總兵出雲南兩道並進勅兵部尚書慶贊其軍以董福有惠於交復使撫之二年通大敗賊交阯城下諸將請乘勝追擊之通猶豫不決賊益堅與都指揮李任指揮顧福劉順相持昌江者九月任等大小三十餘戰力不支竟與福順及知府劉子輔中官馮習皆自殺賊轉圍諒江知府易先亦死之於是利詭言陳氏遺嗣有曰嵩者竄身老撾二十年國人求得願王之爲嵩表求通轉奏通旣數戰不利許之而安遠侯升至獨與其百數十騎自隘留關馳波倒馬橋橋斷陷淖中鏢死後隊皆不得前崔聚斂升兵戰昌江亦

爲所獲與郎中史安陳鏞李宗昉皆死之黎利之守
者得黃福於支稜關羅拜曰公交父母也福欲自殺
守者力止之黎利曰治交者人人如公不有今日矣
護還之龍州而黔國公新寧伯進至歸化等處亦爲
賊所阻利因送還所鹵掠萬三千三百九十一人鑄
金人銀人代身使人奉嵩表陳情謝罪以其寶貨獻
通置酒爲壇盟通乃遣人偕使入京而還師南寧曰
暫出生地圖再戰也表至上示諸大臣英國公輔曰
詐耳先帝勞師有年矣當益發兵蹇義夏原吉對如
初楊榮士奇亦對如初上曰止戈爲武乃遣禮部左

侍郎李琦工部右侍郎羅汝敬等持詔赦交阯使黎利與其頭目耆老具嵩實以聞召通等悉班師三年通還天子下通與馬瑛李安陳智方政山壽馬騏吏贈諸死事者官其子孫是時利已殺嵩篡之矣琦汝敬至黎利曰嵩死別無有陳後國人共推利守國敢自爲之也汝敬怒及宴有女樂汝敬曰吾等往來數月耳嵩安得遽死且爾卽言嵩死爾國嗣亡豈用吉禮時耶因盡擊破其尊壘樂器是時天晴忽陰大雷雨震焚利居室利懼起謝汝敬復進代身金人銀人上表求哀天子業與諸大臣有成言因使復求之凡

再往返報如前乃許利權署安南國利遣使請歲貢金三百斤以拜明賜宣德六年也利上表稱署臣而在其國中實私自帝數誘脅我叛民侵盜邊界羅賂浪如昔二都及斯凜古森金勒丫葛四洞者故欽州治漢時有中州人黃姓者從馬援南征留居之有子七人爲七洞長元時以殺賊功授世官入明皆廢久蝕望及利作賊洞長黃金廣者因以二都四洞叛附利利納焉授之以僞官八年利死十年封其子龍代龍僞名麟麟事朝廷恭英宗正統元年求去其署號爲眞王上以陳氏支裔絕不若正麟位號順而撫之

遂封麟爲安南國王自後其王死皆告哀求封爲故
事麟死子基隆嗣基隆僞名濬久之爲其庶兄琮所
殺國人誅琮立濬弟思誠僞名濶孝宗卽位翰林侍
讀劉戡持詔其國灑獻戡金不受灑爲戡立卻金之

亭

劉戡字景元安福人成化乙未廷試第二人先是
使外國者多治巨艦重載浮海與爲市戡則封安

南知陸道南寧甚逕乃乘肩輿從兩儀忽抵其界夷
人傾駭全日頒詔明日驛畢遂行國王恐竦金珠犀

象餽貽錯落一不顧王復遣人追授諸途不與交一
語安南遣使入謝表有廷臣清白之語戡博學多識

與故嫉邪守正氣豪論卓遇事直前意見捷出尤精
倫鑿見表刺裏分劑參停十不失一權門勢豪庭無

行跡獨與王整相善病革鑿往視之語及國事會劉
文穆罷壽寧侯卒時已不能言忻然索筆爲詩有天

醫老服侍
三月之

其王國中三十餘年頗桀驁匿保樂逋逃

侵龍州界加兵占城緬甸灝死子鏘嗣鏘僞名暉鏘
死子漳嗣僞名敬尋卒弟濬嗣僞名誼誼居國其母
黨阮种阮伯勝用事屠戮宗親鳩殺祖母國人皆怨
亡何种逼誼自殺且擁立伯勝頭目黎廣等討平之
立溱溱僞名暉初灝生二子長暉次瑤暉生敬誼瑤
生灝暉灝子二曰椅曰椿瑤灝俱先死以嫡當立椅
而國人謂暉叔父立之暉既立多行不義國人惡焉
諒山都將陳玄孫者乘國人惡暉也與其子昺昇作
亂鄭綬鄭惟代鄭惟鏜等攻玄孫誅之遂弑暉立椅
椅僞名諷鄭氏者諷母與妻之族也故典兵至是諸

大臣攻鄭氏綏等亡之清華而島昇猶據諒山作亂
有莫登庸者故爲玄孫參督自拔歸諛借其力以
討昇昇封爲武川伯登庸勇有力本都齋漁人也以
安南人世忠義莫氏之家詭言已爲莫邃後賄賂諛
諸左右大臣諸大臣方惡諸鄭專喜登庸起微陋因
請盡屬以國中兵加封太傅仁國公登庸權日盛乃
銷九鼎爲兵器竊取庫藏金寶潛使其弟懽燒宮室
人居殺傷吏民若它盜者因言寇急請自爲興安王
城之謀鳩殺諛兄弟召卜卜與之誓使勿洩卜者洩
焉登庸搜諛宮殺卜者諛床下垣閉諛垣尚缺一角

築人范繇在諛曰爾君也從我者富貴繇曰諾密約
杜溫潤夜候之白虎門下夜雨諛詐游宮中令下皆
酣飲盡醉遂與繇溫潤從缺垣亡去還遣人迎母及
母弟椿與其幼男守者見椿等電光下急追之諛已
縋城出百姓聞諛所在皆爲諛拒殺追者諸州兵亦
稍稍至護之復入諛旣入按誅其大臣之舉登庸者
登庸因殺諛幼男立椿拒守椿僞名應以舟師襲諛
大江而諛宿將皆死兵竟敗鄭綬乃迎諛居清華有
其四府地諛德綬之迎已也封其子惟墜爲叙恩侯
以攻登庸登庸鳩應并諛母殺之僞爲應禪文篡其

位建號大越改元稱詔頒大誥誥自比湯武削奪黎利所據二都四峒長禁其國中無得語黎氏者尋傳國子方瀛自稱太上皇於都齋都齋故其打魚處也其地濱海淤塗十餘里登庸以爲險築壕塹排三層柵下布鐵槍上坐泥草而居之時時凌波而飛持劍下刺魚得巨魚則其下皆噉諱助登庸樂以示武海島上是時諲在清華益不支其妻淑寶爲登庸執而投諸江而惟竣與諲脫身亡入老撾竟死黎氏至是有國一百十年傳十世矣故臣因立其子檉以兵八千人保漆馬江求老撾爲外援檉僞名寧七歲耳其

群臣爲寧浮海請命以莫登庸罪狀告世宗嘉靖十五年也先是上卽位頒詔四夷使者至安南界聞亂還至是哀冲太子生復頒諸夷詔禮部尚書夏言言安南不貢二十餘年矣其國中有篡臣宜罷遣上乃問言故曰如此胡可不討罪也會其冬黎寧浮海之使至下羣臣議皆言登庸殺主絕貢罪當誅發兵擊之便兵部左侍郎潘珍曰黎氏篡逆之國也不貢者又二十餘年誠不足與爲樹且其地非可郡縣置也今北虜滋蕃烽警屢報而我士伍不充芻糧耗匱釋門庭之寇事島夷之鄉非計之急者臣請先擇一二

望臣調兵至交廣界上借之威勢令黎寧自討之不勞成功亦一策也是時總督兩廣侍郎潘旦巡按御史余光廉州知府張岳皆請勿擊者疏亦先後至上方銳意討罪禡珍官名且還使蔡經代之會安南夷人鮮獲登庸偵事者以聞并上其所偽造大誥上以登庸篡逆本國復僭擬天朝益督趣發兵而莫方瀛亦上表乞降上命咸寧侯仇鸞爲征蠻將軍毛伯溫爲兵部尚書兼都察院右副都御史贊其軍按兵境上審視方瀛所以乞降意從便宜撫勦之時嘉靖十八年也廉州知府張岳者恩信素著廉中而梧州知

府翁萬達廣州知府鄒守愚二人故竝以才畧聞伯
溫至則皆致之幕下岳曰岳固請勿擊也蔡經曰空
言罷兵可塞明詔乎岳曰宜要約因與萬達募死士
入交察之使語登庸曰天子誠怒公不臣故誅公耳
豈有利哉不如自歸天子上印章去僭號束身軍門
遣子請罪獻還黎利時所竊據三都四峒如故因奉
正朔世世爲臣天子必謂公卽不順於其君猶知順
中國大皇帝則天兵可罷公等可生也登庸猶豫未
決已聞岳在曰有張太守要我謹如教乃盡籍其人
民土地送表投降伯溫予之期卽闕除壇設黃幄葆

羽燾如車駕將相監司以班列登庸面縛組繫頸徒
跣入關北面坐伯溫受之稱詔解組與其人馳奏天
子天子曰莫登庸不服中國禮義之教稱亂國中朕
不能爲海外夷赦不臣子是用興師問罪責以大義
大軍壓境登庸面縛軍門納土請罪稍與先朝二黎
有間交人禍亂相尋亦爲名位是生人心可去王號
爲安南都統使司毋輒稱國安南有海陽山南山西
交阯安邦諒山太原宣光興化清華又安順化廣南
十三路路置宣撫司設宣撫同知副使僉事各一員
以登庸爲都統使統之秩二品銀章世世歲入明界

上受正朔貢以三歲期二都四洞諸夷爲莫登庸所
苦常蓄歸心悉割入欽州如故黎寧果黎氏子孫與
之所保漆馬江四境否則已之其他土地人民朝廷
無所利焉制下登庸方瀛皆已死登庸將死時已聞
都統使命謂其孫福海曰天朝生我恩厚矣卽死勿
葬畱俟命上聞矜悼之使福海受職毛伯溫等班師
論功有差嘉靖二十年也先是登庸以石室人阮敬
爲義子敬復以方瀛次子敬典爲婿通方瀛妻其後
福海死子宏漢方五歲阮敬因持其國中事自恣有
范子儀者因教登庸別子莫正中篡其位黎氏故臣

黎伯驪護全之正中因與子儀等亡走欽州控于朝
曰宏漢已爲阮敬所殺詔撫臣覈實久不報子儀乃
爲寇欽界上有衆三萬以匡復正中爲辭廣東都司
僉事俞大猷用舟師擊之俘斬千百獨子儀脫走大
猷追至海東雲屯責宏漢捕之函首來獻上命襲封
都統使宏漢竟爲伯驪所逐出死海陽安南復不貢
者二十餘年今上卽位宏漢子茂洽始入修其故事
而黎氏自寧死其舊臣鄭檢等共立寧子寵于西都
寵死無子檢等共推立黎暉四世孫維邦維邦死次
子維潭立檢子松輔之擒殺茂洽復據有安南莫氏

支屬奔竄欽州憑祥間而黎氏叩關求款督臣陳大
利言莫氏篡黎其事逆黎氏復讐其名正先朝旣赦
莫氏之愆則今日宜許其順以夷治夷祖宗成法於
是維潭復爲都統使而莫氏支屬別居之高平府萬
曆二十五年也安南王所居國都及其宮室郡縣取
士養兵之制皆竊擬中國或倣漢唐宋名號所設十
三道道實不及中國一府夷人割裂猥多自誇大耳
其國歲再稻八蠶有魚鹽金珠之利未樂中以金珠
賦又有蜈蚣採之可得明珠者人性輕悍富者役屬
貧弱平居徒跣不冠帶遇節序及其主生日有爵者

乃冠帶尊者具履綦好浴善水溪澗之會醢蜮卵以
薦土客別有窟居獠人用鼻吸酒擊銅鼓爲樂其山
佛跡勾漏江則富良最大三江以西多險阻士馬精
強器甲犀利黎氏盛時藉以威占城諸夷及其衰也
猶能以數州抗莫氏而今張地則然矣

真臘國本安南之屬國在占城西南宋時其酋長滅
占城役屬之號占臘其國自號曰甘字智後訛爲甘
破蔗閩人賈其國方言曰東埔寨也洪武初詔告卽
位其王忽兒那遣使表賀獻方物賜國王明曆及綵
段等物忽兒那卒參合甘武者持達志立屢入貢給

銀印黃金塗王及陪臣皆有賜二十年行人唐敬使
其國國王貢象五十九香六萬斤自後不常至永樂
初告卽位御史尹綬往王見綬綬辭情慷慨威信並
伸旣歸圖山海所經國都所有以上上悅參考甘武
者持達志之後爲參烈毘牙參烈毘牙之後爲參烈
照平牙景泰以後不常至真臘風土元時有周達觀
者使其國載列甚詳且多怪異大抵地邇印度謹於
奉佛

暹羅在南海古赤土地後漢赤眉遺種本名暹羅斛
暹一國羅斛一國居真臘南其音聲似東粵剪髮穿

耳跣而縲腰及骭前後珍寶之國也暹土瘠不五穀
羅斛莽平宜稼暹人仰給之元末羅斛人降暹并稱
斛暹暹明初大理少卿聞良輔持詔其國其王參烈
昭毘牙遣使奉表入貢賜明曆參烈昭毘牙以懦廢
從父參烈寶毘牙噠哩哆囉祿代立以高帝九年遣
其子昭祿群膺修世見上遣禮部員外郎恒賁詔送
之歸稱其內齊家而外睦隣賜暹羅國王印自是始
稱暹羅也參烈寶毘牙噠哩哆囉祿卒昭祿群膺立
二十八年遣使祭其故王賜昭祿群膺雜繒諸物勅
曰朕卽位以來命使出疆周于四外諸蠻夷邦國君

長履境者三十六聲聞者三十一大國十有八小國
百四十九唯暹入中華最近亦唯最好禮守德故王
已逝王紹緒有道于家邦明使者往來具言朕甚嘉
之茲特遣人祭故王賀王登于新敬之哉成祖卽位
遣使人賀十三年昭祿群膺卒子三賴波摩札刺的
賴立數欺凌滿刺加國滿刺加以告制解之暹邏自
永樂中貢不絕上謂暹邏謹有所賜皆及其妃乃命
三年一貢許市會同館一再貿易所挾貲無稅使還
廣東有司宴境上章睿以後不常至然未嘗絕也正
統二年王悉里麻哈賴九年王谷戎有替下十一年

思利波羅麻惹智刺成化間有汀人謝文彬者販鹽
遇風飄入其國界遂人仕焉易名美為貢使嘉靖
中遣使貢白象象道死使使者取象牙鑲以金石珍
寶隨貯白象尾為證尾置金一此時其王名勃
略坤息利尤池牙隆慶初年東蠻牛求婚暹羅拒之
東蠻牛恚圍暹羅破之王自經死虜其世子及中朝
所賜印以歸次子攝國奉表請印上命給予暹羅既
敗其後頗為東蠻牛所制萬曆間其國王引兵迎擊
東蠻牛殺東蠻牛宵遁暹羅遂移軍攻降真臘從此
年年用兵雄於海外其國方千里峰巒峭峻山色如

白石地濕上疎惡嵐熱無常候國中有塔曰西塔其始造時值鄭和至削其合尖後屢合之不能尖也王所居宮用黃金塗帽金帽若白抹首爛周於身以受暎封獨不剪髮臣民遙見王合掌偃僂捫王足三乃自捫首三謂之頂上恩用周正蝦蟆生則拜月曰毋使食也教用釋旁行爲書記大刑用烹鋸男子聽決於婦人謂其多智許其私也爲樓居貫檳榔于藤四維之亦削檳榔之幹爲鏢以吳牛之革爲鏞行錢用貳不用貳則國必大疫其屬國曰亦坤

名山藏卷之

晉江何喬遠 撰

王享記

東南夷三

占城

瓜哇

彭亨

百花

三佛齊

勃尼

須文達那

蘇門答刺

西洋瑣里

瑣里

覽邦

淡巴

蘇祿

古麻刺

古里

滿刺加

娑羅

阿魯

小葛蘭

榜葛刺

錫蘭山

沼納撲兒

拂菻

柯枝

麻林

呂宋

碟里

日羅夏治

合貓里

百里班卒

打回

忽魯

漢新

甘把里

加異勒

祖法兒

淄山

阿哇

南巫里

急蘭丹

奇刺尼

夏刺比

窟察尼

烏涉刺踢

阿丹

魯密

彭加那

捨刺齊

八可意

坎巴夷替

黑葛達

刺撒

不刺哇

竹步國

木骨都束

喃渤利

千里達

沙里灣泥

占城古曰占不勞國在廣東東北古越裳界本秦象

郡林邑縣地漢分爲二縣屬日南郡漢未有區連者

殺縣令稱林邑王唐時諸葛地取之後爲都護張丹
所擊破徙居占號占城宋時襲破真臘反爲真臘所
滅名國曰占臘太祖卽位方遣使詔諭其國王阿荅
阿者已遣使者虎都蠻貢虎象稱賀使歸命行人送
之賜璽書曰虎都蠻至奉虎與象朕悉王篤誠然王
使未至朕使已在途矣正欲報王不期王先朕甚嘉
焉賜王明曆一織金綺紗羅絹四其國數爲安南所
侵三年來言上遣翰林編脩羅復仁兵部主事張福
詔諭并諭安南曰朕有天下海外諸國安南臣服最
先高麗次之占城又次之占城使來言國被安南兵

朕心惻爾朕遠不能知兩國是非念爾兩國封疆匪
今斯今天之限也爾兩國傳世久兩國前王必有遺
訓朕爲天下治亂持危特諭爾知如果互兵上帝好
生必非所悅宜聽朕命各遵其道詔至皆罷兵詔封
阿荅阿者爲占城王以其通文字頒之科舉詔四年
遣其臣來朝請給兵器樂器樂人使安南知其歸命
本朝上曰兩國互爭獨與爾兵是助攻也樂律故同
華夷音異可擇國中通華言者自來肄習之因諭福
建行省毋征占城所挾資八年以其與瓜哇蘇門荅
刺西洋瓜哇彭亨百花三佛齊勃尼諸國貢使所校

行商多行譎禁沮之十二年乃與爲更始明年遣使入賀萬壽節復言與安南戰不利諭勅曰王爲朕上壽甚厚萬里之外使者尅期至非王誠極意專來使篤命曷能有此覽表知復與安南交兵不利朕所以戒爾毋輕讐構一勝一負時當何休好殺兵也好生仁也維天惡兵維天好仁王再審之二十四年阿荅阿者爲其臣門閣勝所殺上惡其弑立絕之永樂元年使告卽位其王占巴的賴遣使來賀乞勅諭安南毋侵掠許之四年上征安南黎季犛令王助兵兵出遣使勅勞明年復安南所侵地獻俘貢謝詔獎之自

是屢表貢七年命鄭和等往賜其國其酋長戴三山金花冠披錦花手巾穿瑇瑁履束八寶方帶臂腿四腕束金鐲前後擁蕃兵五百餘人執鎗刃舞皮牌槌鼓吹椰殼筒膝行匍匐以迎酋長乘象部領乘馬十一年遣其孫舍阿那沙等入貢是冬兵部尚書陳洽言王雖助攻季犛實徘徊懷兩端至化州大擄掠資季擴金帛戰象季擴亦遣王美女王復侵奪升華府所隸州縣其罪等安南當討上曰安南方靖勅諭之而已占巴的賴自水樂以來歲一貢正統二年命三歲一貢以節煩勞占巴的賴卒孫摩訶貴該襲摩訶

貴該爲安南所虜朝命故令諸番三歲一貢而摩訶
及歸臨死謂其姪摩訶貴來曰我海外諸夷故三歲
一貢第天朝待我厚我死爾當立則歲貢摩訶貴來
卒弟摩訶貴繇襲卒子槃羅茶全襲槃復爲安南所
虜弟槃羅悅襲成化年徙居赤坎邦都郎以避安
南而尋亦爲安南所攻殺於是遣給事中馮義行人
張瑾封王弟齊亞麻勿庵爲王使未至亞麻勿庵卒
而其臣提婆苔者受安南僞命爲王義誤以爲真卽
以詔印授提婆苔齊亞麻勿庵之弟古來者怒提婆
苔攻殺之安南怒舉兵壓境欲生得提婆苔古來懼

率其王妃王孫及部落千餘人來請封具言故於是禮臣劾使者擅封義已前死瑾坐謫戍復遣給事中李孟暘往封古來爲王安南人言古來不當嗣嗣者提婆苔爲正古來詣廣州辯訴朝命總督兩廣都御史屠瀟按驗古來實當王移諭安南數之而以聞古來遂得封孟暘致古來於崖州受朝命王反國瀟護之官軍二千弘治三年表謝別附黃白二金若諸器物異香謝瀟辭古來卒其子沙古卜洛來乞封然不明言其父卒有別奏始稍及給事中任良弼言皇祖惡占城譎詐故嘗絕之太宗有事安南念其唇齒始

通封賜然比朝鮮安南故自殊矣比年例貢乞誠
自念屏削仰仗天朝震懼其鄰其實國王立不立不
係朝廷封不封也古來存沒虛實難料萬一其彼父
子素有孽釁我使至或破脅迫如往時給事中林霄
之使滿刺加不宥北面屈膝幽餓而死若命國體不
可不惜大抵海外國無事則廢朝貢而自立有事則
假朝貢而請封占城此來豈急求封急在復安南之
侵地還廣東之逃人耳宜如往年就封事例令其領
勅之國戶部仍咨兩廣撫臣詰責安南令還所侵地
命撫臣逃人諭遣庶全柔遠之道無損中國之威

下禮部集議是沙古卜洛卒沙日底當立正德八年遣給事中李貫往封以無通事諸人爲解致命其使而歸嘉靖二十一年再至其國候熟不霜雪禾稻甚薄地不產茶檳榔菓蠡殼之灰不絕于口以白氈布纏胸垂足衣衫窄袖撮髮爲結散垂爲髻王腦後髮結散被吉貝衣冠金花冠七寶裝瓔珞爲飾躡草履無襪凡國人諸雜色悉得衣第毋得衣白衣白者死其互市用金銀或以吉貝錦定博易之直民居編茅土居鑄金會長之居斃輒灰雕鏤獸畜兵甲藥鏃刀鏢周垣爲防王歲時飲人膽酒又以浴有慶會長

獻膽賀王居國者至三十許年者卽自矢不道入山
受戒令子姪攝居一歲亡恙卽復出爲王其鼓八更
其刑禁設枷鎖小過鞭藤杖當死者樹繫之以梭槍
舂其喉殊之若故殺劫殺出象蹋之或鼓鼻捲撲象
皆知人意槌熏羊皮以代紙削細竹爲筆蘸灰書之
書形如蚯蚓

瓜哇唐訶陵國也一曰關婆一曰滿家龍其國東古
女人西三佛齊南古大食北真臘其屬夷有蘇吉丹
打板綱底勿數種而三齊佛亦羈事之高帝卽位遣
行人賜之璽書頒明曆遣送其故時使元之未歸者

四年國王昔里八達刺八刺蒲遣使表貢方物納元
宣勅受明封昔里八達刺八刺蒲死子八達那巴那
務立九年三佛齊國王子父死不敢自王求封天子
高帝嘉其恭使使往道瓜哇境上瓜哇謂三佛齊故
我羈事而明封與埒要殺使十三年獻黑奴三百上
切責所以要殺明使者絕其後獻而詔諭之曰吾欲
拘爾使念父母妻子之戀夷夏一也是時其國已分
爲東西二王東王王東海西王王西海矣成祖卽位
西王都馬板遣使入賀賜其王襲衣文綺二年東王
李介達哈遣貢求王印予之復賜東西二王雜繪幔

碗器皿羊酒及王妃繒綺諸物三年西王復使貢其
旁近牒里日夏羅治金貓里三小國亦附之來四年
二王皆貢五年西王擊東王滅之明使者在東王城
者百七十人並在擊殺中西王懼罪請以黃金三千
餘斤贖罪併請立東王子從之既所贖三不足一上
曰要使遠人知罪則已赦不問八年十一年西王歲
貢十三年更都馬板曰楊維西沙使者常不絕宣德
後乃稍疎正統中令其三歲爲期其後亦間貢耳而
東王竟久不至蓋先是爲西王所破詭言欲立其子
竟不果而遂減一瓜哇人黝面髡跣腥食啖蛇蟻虫

豸至與犬同臥噉俗好鬪子生一歲佩之匕首以金銀象牙爲靶名曰不刺頭忿則挾相刺殺人者能逃匿出三日卽不復抵罪婚則男過女家者五日乃迎婦歸婦披髮裸跣縈繒被金寶前後擁衛如軍容病則禱不服藥葬用水火犬三惟死者所命之貴人死婢妾隨至野委貴人屍於衆犬自焚以殉之其王蓬首冠金葉胸縈縑腰束錦四丈之宮磚墉以居藤蓆而踟躕乘象或牛罪無輕重皆用刑殺市用中國古錢衡量倍中國鄭和至其國時遺石控可百斤其重二千餘人不能舉也一日舉之

所國中
大瘟疫國

王乃移還和所置處故志其國四鄉富饒澹溢閩粵
西番人至久賈長子孫地廣人稠爲東洋諸番冠而
余嘗至粵下博問諸賈胡謂瓜哇窮儉酗酒嗜財好
毒劫豈隆竄良悍夷亦有時也其屬國曰加留吧丁
機宜蘇吉丹主蘇吉丹國者曰吉力石吉力石有王
百餘歲能知吉凶

彭亨國在暹羅之西石崖周匝遠望則平田沃豐米
穀氣候溫洪武十一年國王麻哈刺惹荅饒遣使奉
表貢番奴方物永樂十二年再至故志上下親狎無
寇盜男女椎髻尊佛其故俗也萬曆中而其國中有

柔佛之事柔佛彭亨鄰國也其國有副王爲人強悍
關狠副王子娶彭亨王女將婚副王送子之彭亨彭
亨王享副王爲置宴戚屬而有婆羅王子者彭亨王
妹之婿也贅于彭亨酒半婆羅王子舉觴爲壽其手
指有巨珠甚美副王心欲之且許之重賞王子固靳
不與副王恚甚歸而起兵攻彭亨彭亨柔佛兩國相
婚媾柔佛人猝至莫爲防不戰自廢王與婆羅王子
奔金山彭亨王妃淳泥王之妹也率衆來援副王大
焚掠其城郭宮室以歸是時也彭亨國中鬼哭三日
淳泥王迎其妹還淳泥彭亨王隨之命其長子擁國

王歸彭亨其次子亦驍悍遂毒父誅兄自立今尚爲王也

百花古注輦國南海中國也以多奇花故名國東南約二千五百里民饒尚釋貢在洪武十一年其國王曰刺丁刺者望沙

三佛齊國古干陀利又曰淳淋羈事瓜哇者也有地十五州又有旁近單馬令凌牙斯蓬豐登牙儂細蘭諸種屬國主號曰詹卑其人多蒲姓洪武二年使至其國四年國主馬哈刺札八刺卜遣使隨貢賀卽位賜明曆若諸文綺中間一再貢王卒怛麻來沙那阿

者嗣亦有貢九年卒麻那者巫里表當嗣來乞封貢
犀牛黑熊火鷄紅綠鸚鵡白猴龜筒及諸雜物又貢
小番奴一人帝嘉其恭厚賜之遣使者齋詔冊封賜
駝紐銀印黃金塗而使者爲瓜哇所要殺然久之三
佛齊亦詒我他使羈留焉三佛齊扼諸番咽喉商舶
不入其境者輒出舟與戰以故其地爲商舶湊而我
使者欲往海外番者行不絕自羈留我使臣恐誅道
不通番商絕永樂中竟爲瓜哇所兼國亡廢其國都
曰舊港有南海人梁道明者棄鄉里往居之閩廣民
從爲商者以數千推道明爲酋長施進卿副之永樂

三年指揮孫鉉使諸番遇道明子及二奴挾與歸以
聞成祖遣行人譚勝受招之道明隨使者入以其衆
屬進卿成祖喜賜襲衣及文綺繪帛甚盛而廣人陳
祖義者故有罪亡入其國久之亦有衆與進卿爭長
上使中官鄭和下蕃和至進卿以告使招之祖義詐
降而潛謀邀劫爲和所覺勒兵與戰殺其黨五千餘
人擒之俘京師斬于市是年進卿遣其壻彥誠入貢
詔設舊港宣慰使司命進卿爲宣慰使二十一年進
卿卒子濟孫奏襲許之復命鄭和齎賜往自是朝貢
比諸番其地累甃爲城人民散處城外部領居岸餘

皆屋木筏多熱少寒土沃倍地壤彼夷相傳云一年種穀三年生金言穀熟多也自國破以後不逮往時矣

淳泥國西南海中國也州十四本羈事閩婆其地炎熱多風雨板城銅甲王縮髮裸跣徒行花帛繚腰所居若樓覆以貝多葉其民剪髮覆額女人短衣蔽胸背花帛繚腰散髮跣其俗漁煮海爲鹽瀝椰爲酒無稻麥或腥食魚蝦或食木實漿曰沙糊燕樂鳴鼓擊鉞刻貝葉行書事佛謹明興其國王馬合謨沙也國侵於蘇祿閩婆爲發兵擊劫之洪武三年福建行省

都事沈秩與監察御史張敬之奉詔其國王不爲禮
秩傳譯曰皇帝撫有四海極日窮月無不臣順淳泥
彈丸豈何敢抗中國大天子王懼然起謝撤座設几
拜授詔請後之二三年造舟入貢秩曰皇帝卽位三年
矣四夷朝貢使者頂踵相狎卽行尚晚何年之三也
王曰非有他地瘠民貧而又被兵空國無以獻明日
與其國相王宗恕圖行行有日闍婆使人言曰我實
爲王却蘇祿兵王歸中國無我矣蘇祿再來則請掇
於中國王懼明日秩見辭以疾秩知之對宗恕大言
曰王甘臣闍婆卽謂闍婆非中國臣耶宗恕入白王

王乃大會官屬遣其臣六思麻亦等四人貢與秩俱
既至高帝寵賚甚厚成祖初麻那惹加那乃爲王遣
使封之六年率其妃及弟妹男女陪臣俱來成祖命
中官與勞之閩中所過縣邑設食宴既至親享之奉
天門賜儀仗銀器王以下使如中國服其年王卒會
同館上輟朝三日賻贈有加工部具棺槨明器葬德
安門外樹碑神道求西南夷籍中國者爲守塚有司
春秋少牢祠諡曰恭順命其子邁旺襲遣中官謙行
人航護之還國賜金銀有差初麻那惹加那乃請表
其國之後山爲國鎮邁旺將行復以請上封其山爲

長寧鎮國山親賜之碑文曰上天啓佑我國家萬世
無疆之基肆命朕太祖高皇帝全撫所覆休養生息
以教以治薄極照臨臣服充湊朕嗣守鴻圖和協所
統亦克承意乃者淳泥國王麻那惹加那乃慕尚聲
教益謹益虔率其眷屬陪臣浮海來朝稽顙陳辭遠
方臣妾丕冒洪恩旣庶且安夫天仰則覩之矣地立
則依之矣天子補天柱地遠在中華弗依弗覩臣誠
弗通是以不憚遠險輒敢造庭崩角闕下朕曰唯天
唯皇考畀予天下視民同仁予夙夜恐弗堪弗若汝
言王拜手稽首自天子建元之載臣國和時豐山川

之藏珍寶流溢草木之無葩藹者以實以華異禽和
鳴走獸蹠舞國中之叟曰中國聖人德化所暨斯多
嘉應是以矜奮而來覲也朕緝稽載籍邊遠之邦被
聞四訖忽險鑿空歸身中夏蓋亦有人至于掖挾妻
子率該兄弟總同臣僚款心玉帛頰首階陛自古惟
王西南君長無如王賢茲特封王國之山長寧鎮國
賜文刻碑以著王休系之詩曰炎海之墟淳泥所處
趨景赴聲有順無忤悽悽賢王唯化之慕重譯更胥
聿來奔走同其婦子兄弟陪臣跂伏悅喜具言以陳
內鑒鮮德弗稱所云浪泊風檣實勞懇勤稽古遠夷

順來怒趙以躬或難矧或家室鬱崛高山作鎮王國
傳金勒銀懋昭順德王德克昭王國攸寧於萬斯年
仰我大明遐旺還國遣其叔父慶的哩哈盈等百八
十人貢方物入謝其後洪熙中復來貢表用刻金番
字彷彿回鶻書其辭固不足觀也萬曆間國王病卒
無子族衆爭立相誅殺俱盡乃立其女主爲王其屬
國曰吉蘭丹

蘇門答刺國漢之條支唐之波斯大食皆其地也其
西有蘇鄰國摩尼佛生焉號具智大明使自唐時入
中國相傳老子西入流沙五百餘歲當漢獻帝建安

之戊子寄形捺暈國王拔帝之后食而甘之遂有孕
摩胸而出是爲摩尼佛捺暈者禁苑石榴也其說與
攀李樹出脇相應其教曰明衣尚白朝拜日夕拜月
了見法性究竟廣明蓋合釋老而一之行於拂菻火
羅諸國晉武帝太始丙戌滅度于波斯太祖有天下
以其教門上逼國號禁除之永樂三年酋長宰奴里
阿必丁遣使朝貢詔封爲國王王與鄰國花面王戰
死其子鎖丹罕阿必鎮幼其妻號於國曰誰復此讐
我以爲夫國中有漁父者遂爲王妻殺花面王妻曰
夫我遂尊漁父爲王號爲老王老王遣使來貢久之

鎖丹罕阿必鎮長陰與部曲謀殺漁父而漁父之子
蘇幹刺者復謀殺鎖丹罕阿必鎮爲父報讎鄭和入
海賜諸番蘇幹刺忽朝賜僅及鎖丹罕阿必鎮領衆
邀擊和軍和與戰敗之蘇幹刺走追至喃淳國并獲
其妻子俘行在伏誅宣德中一再貢厚賜之九年王
弟哈利之漢來貢麒麟象禮部尚書淡請表賀不許
曰朕貴異物耶遠人來不逆其意耳亡何卒京師上
曰遠人傾嚮死可憫也贈之鴻臚寺少卿賜誥治喪
葬給守塚戶十年請封其子爲王其來貢至於正統
天順間其數傳於今再易姓萬曆中爲國王者其國

中之大酋奴也奴爲其大酋牧象象肥大酋喜使掌魚入其稅奴得大魚輒上酋不以充稅酋益喜甚親之大酋爲其國王掌兵兵皆在大酋手大酋入見王甚恭大酋出奴曰主何恭大酋曰王也奴曰主不欲耳欲之王矣因言我國王坐殿中甚肅第左右數人耳主入見請王屏左右密言事王必從奴直上刺殺王主可王矣大酋從之其計果行遂刺殺王大呼殿上曰吾主王矣孰敢不從其殿下卒不知所爲大酋所掌兵又在門外因誅其偶語者數人其餘悉授官大酋益德奴與之以所掌兵他日奴又以其兵刺殺

大酋而自爲王其國風俗醇良言語和媚民居技藝
與中土同賄貨充牣其地遼遠至者倍利其西海中
有龍涎嶼焉羣龍交戲遺涎其上其名龍涎之香其
鄰有故臨國有默伽國有那孤國故臨國人黑如漆
好爲寇盜那孤國卽花面王所居國也或曰是國也
卽須文達那國須文達那宋名也洪武十六年其國
王表貢請改曰蘇門答刺然其貢物與須文達那異
西洋瑣里又曰瑣里兩國也西洋瑣里視瑣里差強
大瑣里國微弱時時爲西洋瑣里所侵洪武三年西
洋瑣里國主別里提遣使來貢進金葉表文上念其

遠涉賜賚甚厚五年瑣里國主卜納的亦遣使進金字表文并圖獻其上地山川上賜國主曆書及織金絲段紗羅各四亦有賜于使臣永樂元年二國竝貢詔勿征其附船貨物其末年西洋十六國皆有貢至瑣里獨豐美二國皆產布而西洋瑣里之布尤佳

覽邦漢疎勒國也去西域遠甚好佛無賈販用錢地多沙磧產麻若麥而已其山陂陀其水淺濁有駝馬牛羊洪武九年國王昔里馬哈札的札遣使朝貢永樂宣德中附鄰國貢方物

淡巴古狼牙脩國西南海中國也洪武十年國王佛

噶思囉遣使貢其國風景秀贍土衍水清石城而瓦
屋王與其臣出入導從具威儀耕織勤生市有交易
野無寇盜樂土也

蘇祿國在東南海中與淳泥瑣里相近其國分東西
別有一峒竝不相統攝永樂十五年權東國者曰巴
都葛叭荅刺權西國者曰麻哈刺吒葛刺麻丁故權
蘇祿峒者之妻曰叭都葛巴刺卜各率其屬及隨從
頭目三百餘人奉表來朝獻珍珠寶石玳瑁等物既
至封巴都葛叭荅刺爲東王麻哈刺吒葛刺麻丁爲
西王叭都葛巴刺卜爲峒王東王爲尊西峒副之所

以賜予良厚既辭歸至德州東王病卒命葬以王禮
上爲文碑之留其妃妾僉從十人守墳畢三年而後
返勅諭其子都麻舍曰爾父躬率家屬陪臣涉海尊
中國朕眷悃誠錫之王封優賜護還舟次德州遽以
疾逝朕深憫悼祭葬如禮今特命爾爲蘇祿東王爾
尚益懋忠貞承厥父志欽哉十九年都麻舍來朝獻
巨珠一顆重七兩五錢蓋其國有珠池云其俗山涂
田瘠食沙糊魚蝦螺蛤男女短髮纏皂纒養海爲鹽
釀蔗爲酒織竹爲布中國人往賈者冀其復來臨歸
輒畱數人爲質

古麻刺國東南海中國也國有百餘州佛宇四千餘
永樂十八年國王幹刺義亦敦奔率妻子陪臣來朝
封爲國王歸至福州卒詔諡康靖勅葬閩縣有司歲
時祭

古里國永樂元年酋長馬那必加刺滿遣使朝貢三
年復貢詔封爲國王鄭和下番自古里始西洋諸番
之會也二十一年西洋十二國遣使千二百人貢方
物古里最其俗信義行者讓路道不拾遺王好浮屠
族類分五種煨牛糞爲囊佩之或以塗肢體

滿刺加國古哥羅富沙也在占城極南諸番之會也

暹羅羈屬永樂初中使自閩中至其國繇是而達西
洋古力里士國分隸徧往支柯丹拐葛刺忽魯謨斯
等處迨其反也咸於是聚齊焉永樂七年封其酋西
刺八兒速刺爲王逮已爲國王遣使來請封其國之
西山得保疆毋生心於暹羅詔封爲鎮國山賜御製
碑文勒石系詩曰西南鉅海中國通輸天灌地億載
同洗日浴月光景融兩崖露石草木濃金花寶鈿生
青紅有國于茲民俗雍王好善義思朝宗願比內郡
依華風出入導從張蓋幢儀文裼襲禮虔恭大書貞
石表爾忠爾國西山永鎮封山石海伯翁尾從皇考

陟降在彼穹後天監視久益隆爾衆孫子萬福崇而自是不羈屬暹羅如舊時矣九年嗣王拜里迷蘇刺率其妻子陪臣五百餘人來朝上念其遠來遣中官海壽禮部郎中黃裳宴勞之廣州有司供張會同館既至表見獻方物上御奉天門宴勞之妃及子姪陪臣有別宴仍命光祿寺日給牲牢上尊賜王錦繡龍衣二襲麒麟衣一襲若金銀器皿幃幔裯幘王妃及其子姪陪臣僚從皆賜有差王辭歸餞于奉天門別餞妃及子姪陪臣賜勅曰王數萬里涉海朝京師坦然無虞維王忠誠孚祐于明神朕見王甚歡便欲留

王國人在望宜往愍之天氣向寒順風南帆實惟厥
時王尚途中彊飲食善調護賜王金鑲玉帶一儀仗
一鞍馬二黃金百兩白金五百兩鈔四萬貫銅錢二
千六百貫錦綺紗羅六百匹絹千匹渾金文綺二金
織通袖膝襪二王其受之王妃及子姪陪臣復有賜
命禮部餞宴之龍江龍潭二驛十二年國王子毋幹
撒干的兒沙來告父卒命嗣封十七年國王亦思罕
荅兒沙嗣立復率妻子朝後使來言暹羅國欲攻之
詔暹羅與平亦思罕荅兒沙卒二十年其子西哩麻
哈刺率其妃及陪臣來朝宣德九年復至宣宗念王

父永樂中舉國來朝至王益脩臣賜王冠帶賜勅
獎諭命工部繕王舟于從行二百餘人皆有厚賜正
統中國王息力八密息瓦兒丟八沙乞賜勅書及蟒
龍衣服傘蓋求一舟而將來朝焉景泰中王卒子無
咎佛哪沙請封遣給事中王暉往天順三年王卒其
子蘇丹茫速沙嗣遣給事中陳嘉猷往卒子烏哈木
沙嗣成化十四年來請封命禮科給事中林榮爲正
使行人黃乾亨副之還溺死以此遂罷遣其國正德
十三年國王蘇端媽未爲佛郎機酋所逐而據其地
使三十人者從廣東入貢時廣東左布政使吳廷舉

兼海道副使議許之廣東守臣以佛郎機故不列于
王會羈其使以聞詔給方物遣之歸使者留不去劫
奪行旅掠食小兒廣人苦之會滿刺加來訴御史丘
道隆何鰲相繼疏言佛郎機擅奪天朝受封之夷據
有其地且駕大船操凶器往來交易爭鬪殺傷此南
服禍始也昔祖宗時夷貢有期毋敢闌入自吳廷舉
議弛禁于是夷心無厭射利如隼揚帆如馳以致佛
郎機伺隙而侮今宜驅絕之毋留詔從之而佛郎機
有使者曰亞三能通番漢賄江彬薦之武宗從巡幸
武宗見亞三時時學其語以爲樂他日有事四夷館

兀坐不見禮部主事梁焯焯怒杖亡二彬聞大詬曰

彼嘗與天子遊戲官下跪一主事耶

焯南海人正德甲戌進士以諫

南巡被杖

世宗卽位佛郎機復以接濟使臣衣糧爲名請

以所齎番物如例抽分詔復絕之率其屬疎世利等千餘人破巴西國入寇新會縣西草灣指揮柯榮百戶王應恩截海禦之生擒別都盧疎世利等四十二人斬首三十五級餘賊復來接戰應恩死之海道副使汪鋹遂得其銃以獻名佛郎機銃自是佛郎機諸番夷舶不市粵而潛之漳州二十六年巡視浙福都御史朱執嚴海禁漳人不敢與貿易捕逐之夷人憤

起格盡爲我所殺語在日本記而廣東督臣林富更
言許佛郎機市有四利焉中國之利鹽鐵爲大山封
水煖仵仵終歲僅充常額一有水旱勸民納粟猶懼
不遂舊規番舶朝貢之外抽解俱有則例足供御用
利一也兩廣用兵連年庫藏日耗藉以充軍餉備不
虞利二也廣西一省全仰廣東今小有徵發卽措辦
不前科擾於民計所不免若異時番舶流通公私饒
給利三也貿易舊例有司擇其良者如價給之其次
資民買賣故小民持一錢之貨卽得握椒展轉交易
可以自肥利四也助國給軍旣有所賴在官在民又

無不給此因民之所利而利之也非所謂開利孔爲
民罪梯也從之以此佛郎機得入廣東香山灣爲市
香山灣之有佛郎機若懸疣然而滿刺加國竟爲佛
郎機所據漸奉之爲真主矣佛郎機黠夷也貓睛鷹
嘴拳髮赤鬚而貌皆白屬于系臘國行賈無所不至
至則謀襲其國人滿刺加海有龍窠高四尺四足有
鱗甲露長牙嘴人立死山有黑虎或變人形入市殺
人合佛郎機爲三害云汪鉉旣擒佛郎機傳其銃後
爲吏部尚書會北虜入寇鉉請頒佛郎機銃於諸邊
邊鎮賴其用

娑羅國東洋盡處西洋所自起也國有東西二王永樂四年各遣使朝貢其國負山面海而謹佛教今王爲閩人隨鄭和至留其國者其府旁有中國碑王有金印一上篆文作獸形云是永樂中所賜夷人嫁娶請印印背上其國嘗爲佛郎機所逐走入山谷中放藥水流出毒死之佛郎機以是犇呂宋之其化

阿魯國一名啞魯其國廣人稀物產亦薄永樂五年其王速魯唐忽先遣使附古里諸國朝貢

小葛蘭海上小國也與柯枝接壤永樂中鄭和至其國王鎖里人遣人入貢俗尚浮屠重象牛飯和酥酪

市用金錢婚喪巾服大類錫蘭山

榜葛刺國西天有五印度國榜葛刺者東印度也永樂六年國王嚮牙思丁遣使朝貢九年復至命行人宴勞之太倉王卒子賽弗丁嗣中使侯顯嘗奉詔往使王待之甚恭表獻麒麟正統三年復獻麒麟鸚鵡等物禮部尚書胡濙請表賀從之其國地廣人稠甲他夷王及臣僚皆回回人有印章行移陰陽醫卜諸技大類中國優人曰根肖速魯奈奈能作百戲善弄虎曆不置閩耕種二年一熟產鎖鉄翠羽兜羅錦及諸異布

錫蘭山國古狼牙須亦曰裸形國不衣也亦不穀食
與柯枝對峙以別羅里爲界占城極西可望見焉其
國有翠藍山獨高山外蕃語謂高山爲錫蘭也山頂
產鴉鵲寶石每雨甚衝流下可拾取海畔石有巨人
武長三丈許云是釋迦足跡下有臥佛寺舍利在其
寢傍永樂初國王亞烈苦奈兒者鎖里人數邀劫往
來使者諸番苦之七年鄭和偕行人諸蕃至其國王
侮之欲加害和覺而去及歸復過王王誘和至國中
令其子納言索金銀寶物不與潛發番兵五萬餘出
劫之和覺擁衆回舟而亞烈苦奈兒已先伐木拒險

絕和歸路和語其下曰賊衆大出國中必虛出不意
攻之可得志潛傳語舟人盡力死拒自率兵二千以
夜半間道疾走急攻王城破之生擒亞烈苦奈兒并
家屬頭目蕃卒復圍城交戰數合大敗之遂以歸九
年至闕下群臣請誅之上曰朕憫其愚釋而與衣食
命禮部詢所俘國人擇其支屬賢者立之國人皆舉
耶巴乃那十年遣使賫詔印往封并送亞烈苦奈兒
歸時國人已立不刺葛麻巴思刺查爲王詔使遜位
十四年偕占城爪哇諸使貢方物復命鄭和等賫賜
之并及諸國王自後宣德正統天順間俱入貢其國

地廣人稠貨物之聚亞於瓜哇尚佛重象牛調牛糞塗地而禮佛煨之以塗體

沼納樸兒國在印度之中古佛國也永樂十八年國王亦不刺金數侵榜葛刺國遣使勅諭之

拂菻國唐書以爲漢大秦國也去嘉峪關萬餘里洪武四年遣其國故民捏古倫齋詔諭之尋遣使朝貢其國產金銀珠西錦千年棗馬獨峰駝巴蒲葡萄不尚戰鬪懸大金秤以金九十二定日時每時至輒一丸墜市用金銀錢絕私鑄勒王名於錢陰

柯枝古槃槃海上國也去古里二洪一來貢

永樂二年王可亦里遣使來貢十年復來十五年封
爲柯枝國王使鄭和與使者偕賜之印誥并封其國
中山爲鎮國山碑之文曰朕撫治華夷擬古帝王柯
枝國遠在西南鉅海濱欣慕教化命令之至率跪鼓
舞仰天而拜曰我國數歲以來宴樂和煦皆中國聖
人教化所沾朕揆德薄不能致然其長民者之應歟
旣封亦可里爲其國王并封國中山爲鎮國之山勒
碑其上垂示亡窮系以銘曰截彼南山吐烟出雲爲
下國洪龐時其雨暘肅其煩歎作彼農穰庇于斯民
靡蕃靡沴不若不逢海深山嶄勒此銘詩相爲始終

其國尚浮屠敬象牛每旦鳴鐘鼓灌佛頂數遍乃禮之國人五種曰南昆貴族也次回回人次哲地富有財者也次革全牙僧也次木瓜卑賤矣

麻林國未詳所在永樂十二年遣使朝貢進麒麟天馬神鹿群臣稱異上喜厚賜之

呂宋海中小國也其國王以永樂三年遣其臣隔察老朝貢而今亦爲佛郎機所有名曰呂宋實佛郎機也初呂宋王有兄弟二人武而有信佛郎機互市其國利其爲西洋諸番通貨之會奉黃金爲呂宋王壽從王乞地地如牛皮許大許之佛郎機歸而截牛皮

緝長之方四圍呂宋王有難意業許之不得辭歸地
於佛郎機佛郎機有呂宋地築城屋列兵器久之殺
王兄弟逐呂宋民入山中凡中國以貨來者皆主之
于系臘國使大酋來鎮之數歲則易一王其地邇閩
閩漳人多往焉率居其地曰澗內者其久賈以數萬
馬有削髮長子孫中國人衆不能無生貪黠而佛郎
機輕侮役屬之美洛者海上國也佛郎機會征而奪
之揀中國人助戰人以貳百餘中國人晝夜爲佛郎
機警備佛郎機會高枕而已中國人稍懈輒鞭箠或
刺殺之中國人皆怨有潘利五者夜入會臥內刺殺

僧持曾首大呼佛郎機人大驚起不知所爲悉被刃
或落水死利五與其黨大載佛郎機貨物以歸失水
道誤入交而交人掠之獨郭惟泰等三十餘人走免
曾死其子代曾遣僧人入閩訴之巡撫都御史都御
史使人招回中國人曾人給米爲歸復致書訟
父冤事聞檄兩廣督臣以禮遣僧置惟泰等于理萬
曆三十一年也三十二年天子採金方內有妄男子
張嶷上書言呂宋有機易山其上金豆自生可採也
天子下其書廷臣力言謬不報閩巡撫都御史使海
澄永王寺和及百戶一人與嶷往佛郎機欲乘酒問

丞金豆生何樹也丞無以對數目疑疑爲大言大言
皆金何必問樹夷酋大笑幾殺丞丞歸病悸死疑無
以報天子天子誅疑傳言海外夷人故虐侮中國人
至是益疑會中國人被虐者怨望出大言夷益恐
盡買中國人手中鐵雖機上刀竈上釜悉厚倍其直
諸中國人鐵皆空遂大殺中國人死者二萬餘會猶
慮中國與兵問罪入廣東香山海偵諜中國乃寂然
閩廣當事者草草聞上而不敢盡言上下旨呂宋無
開事端已而中國人又商販其處矣其屬夷有大港
有南旺有玳瑁港有呂落有磨老央有以寧有屋當

有朔霧而皆佛郎機主之佛郎機破
朔霧有力
焉佛郎機德之既奄有諸土率虜使其民獨與朔霧
爲婚媾其人敬天稱天曰寥氏

郎曰余志海外諸夷兼時事焉余海上人習知之也
今我不述後將何聞

碟里國在東南海中尚佛人淳物產薄永樂三年遣
使馬黑木來朝

日羅夏治國海中小國也產蘇木胡椒頗知種藝崇
佛不盜永樂三年遣文那引時鎮來朝

合貓軍國小國也土瘠多山而知耕稼山外大海饒

魚虫永樂三年國王遣回回道奴馬高附瓜哇以貢
古里班卒國在海中永樂三年國王遣人馬的來朝
其俗質朴土瘠物薄夏天多雨兩候卽寒

打回國永樂三年遣麻勿來朝貢其國數爲鄰國所
苦已乃治戰稍得自立

忽魯謨斯又曰忽魯毋思海中國也永樂七年遣鄭
和往其國會長感悅來朝十八年進麒麟獅子天馬
文豹紫象駝鷄福鹿靈羊長角馬哈獸五色鸚鵡等
物駝鷄昂首高七尺福鹿似駝而花文可愛靈羊尾
大者重三十餘斤雨則以車載其尾長角馬哈獸角

長過身上喜命侍臣爲賦其國石城石屋民富饒喜
作佛事常歌舞惡殺產大馬其酋長練兵畜馬田瘠
宜麥無草木牛羊駝馬盡食魚腊文武醫卜技藝之
人勝他國國中有大山四面異色紅如銀硃白如石
灰黃如薑黃一面產鹽如紅礬鑿爲盤匱乘食物不
加鹽矣

甘把里又曰甘巴里在南海中永樂十二年國王兜
哇刺查遣使朝貢其人鮮食多織錦

加異勒國西戎小種居人寡少窶而傭鄰國永樂中
王者麻里奈那遣使朝貢宣德正統間一再至

祖法兒國亦曰左法兒漢之大夏隋唐之吐火羅咸
皆其國也東南皆海西北重山自古里西北海行十
晝夜可至永樂中王亞里遣人朝貢宣德中復至其
地氣候常秋無城郭其人體幹脩碩語言真質尚回
回教王白布纏頭衣青花絲帨或金錦袍靴履出乘
輜跨馬前後列象駝馬吹篳篥市用金銅錢錢文人
形有家鷄如鶴脚二指毛如駝走如之

溜山國永樂中國王亦速福遣使來朝其國在西海
中四面濱海有石門無城闕皆巢居穴處衣草木葉
啖魚蝦依山聚居八村稍大皆以溜名餘小溜無慮

三千失船入溜溺矣土人曰三千弱水也山傍有牒
幹國皆回回人業魚種椰氣候常熱市用銀錢

阿哇國永樂三年王昌吉刺遣人來朝貢

南巫里國或曰卽南泥里永樂三年來朝貢其國隸
淳泥自蘇門荅刺舟行三晝夜可至東距黎伐西北
距海南連大山山南際海僅千餘家皆回回人俗朴
實王居頹樓高廣整潔市用錢少穀食食魚蝦西北
大海卽西洋中有帽山番船以爲指南土人名之曰
那沒黎山下淺水有珊瑚樹大者高二三尺依山居
人二三十家皆稱王問其爲誰輒曰阿孤楂華言王

也或曰南泥里卽南巫里

急蘭丹國

奇刺尼國

夏刺比國

窟察尼國

烏涉刺踢國

阿丹國地瀕海近古里壘石爲城羅石爲屋田饒粟他產亦多有國步勝兵七八千人鄰國畏之

魯密國

彭加那國

捨刺齊國

八可意國

坎巴夷替國

黑葛達國小民貧平川廣野草木暢茂禽獸鮮少尚
佛畏刑市肆多牛羊交易用鐵錢宣德中遣使十人
來朝貢方物又有白葛達國宣德中至

刺撒國自古里舟行順風二十晝夜可至城屋俱以
石其俗淳厚喪葬有

不刺哇國永樂中遣使朝貢地斥鹵有鹽池投樹枝
于池頃刻鹽凝其上其人拳髮圍布捕魚爲業

竹步國

木骨都刺國瀕海城屋俱石物產最多

喃渤利國

千里達國

沙里灣泥國以上海外小夷永樂中遣使朝貢

凡東夷之貢表文皆用金葉

郎曰此其載之會典入我王會者爾此外尚有柔佛國強國也其人好鬪有文郎馬神國或云馬文淵遣兵十餘家其國故有馬名其俗不好淫者論死入山深處有村名烏籠里彈其人盡生尾有遲悶國故吉

里地悶也居重迦羅東俗以立爲尊夷人見王則坐
地合掌有貓里務國卽今貓里國善國也船人爲之
語曰若要富從往貓里務比爲其鄰國島網巾礁老
所寇盜國轉貧有沙瑤吶囉囉二國吶囉囉在海畔
沙瑤稍紆入山陰皆呂宋一帶有班隘其人皆頭
赤身其山甚奇有仙人出沒焉有美洛居東海中蕃
富之國也屢與佛郎機利蘭夷爲鬪爭有紅毛番夷
利蘭也深目長鼻毛髮皆赤故呼紅毛一名粟果國
萬曆間欲求市於閩省閩廣守臣力拒之其人器械
精利數往來海上苦諸夷獨佛郎機與之角又有雞

籠淡水夷在泉州彭湖嶼東北名北港又名東番永樂中鄭和入海諭諸夷酋獨不聽約束和貽之家一銅鈴使頸之蓋狗之也